

Mit Federn schreibt man Carmina,  
Postillen vnd Prognostica,  
Urtheil vnd Recht/ vnd was sein kan/  
Der Federn nehet sich mancher Mann.  
Stadtschreibern vnd Notarijs  
Die Feder dient vnd nützt gewiß/  
Vnd ist ein wunder ding darumb/  
Das Sachen machet schlecht vnd krumb/  
Es kömmt vom lebn/ vnd hat kein lebn/  
Kan doch ein jedern Antwort gebn/  
Es kömmt vom Bein/ vnd hat kein Bein/  
Dient doch ein jeden in gemein/  
Es kömmt vom Fleisch/ kein Fleisch doch hat/  
Vnd wirt gebraucht frue vnd spat.  
Es kömmt vom Blut/ vnd hat kein Blut/  
Auch keinem Menschen dienen thut/  
Man schneid ihm dann sein Kopff erst ab/  
Die Haut vnd Hahr vom Leibe schab/  
Vnd schliß ihm forne auff sein Bauch/  
Vnd nehm ihm draus sein Seele auch/  
Darauff es dann ein Trunck bald thu  
Von Essig/ Bier vnd Wein darzu.  
Als denn wirts hin vnd wider gehn/  
Sein Meynung geben zuverstehn/  
Wie aller Sprach es reden kan/  
Freundschafft vnd Feindschafft richten an.  
Durch diß wirt mancher hochgeacht/  
Mancher vmb Leib/ Gut/ Ehr gebracht/

Wer